

С. Выстропова сунъгъачнрин даалгъвриг кўцәхми

САДОВОЕ. (Телефогъар мана корреспондентәс). Сарпинск района культурин Герт, сунъгъврин 57-ч номертә Садовск округар Хальмг АССР-н Деед Советин депутатин кандидат темдгдсн үр Степанида Васильевна Выстропова сунъгъачнрлагъан харгъв.

Эн хургиг сунъгъврин округин комиссин ахлач И. Иванов секәд, итклтә күүнд, «Гигант» колхозин ах инженер үр Шараевд үг өгсн, ахрар Степанида Васильевнан тускар эн иигдж келв: — Депутатин кандидат үр Выстроповаг тадн цугъар меднәт. «Гигант» колхозин тәрәнә халхин көдлмшт эн ордж көдлснәс нааран, элвг хөрн джил болджана. Эн джилмүдин эргцд Степанида Васильевна күч-көлснд дурта, олна кергт болн бийдән даалгъснд оньган өгдг, эн тоотас күчнчидлән, эв-аргъан эс хармндг механизатор болдж, эдл-ахун аль-бис тосхлтднь шундж орлцна. Тегәд чигн дамшлтта шунмгъа көдләчиг колхозин правлень 2-ч тракторн бригадт бригадир орулв.

Степанида Васильевна цуг мана даалгъвр, итклиг әрүн кевәр кўцәх элч, тер учрар сунъгъвр болх өдр негн мет энүнд дуугъан өгий — гидж цуг сунъгъачнриг дуудж үр Шараев үгән төгсәв.

Дарунь босси, тосхлтин конторин начальник үр Балабанов; Садовск селәнә Советин ахлач үр Коробкин, ВЛКСМ-н райкомин сегләтр үр Ематинава болн нань чигн кесг улс сунъгъвр болх өдр депутатин кандидат үр Выстроповад дуугъан негн мет өгхми гидж келцхәв.

Хургин сүүләр депутатин кандидат Степанида Васильевна Выстропова босад, цуг сунъгъачнрт ханлт өргәд, тана иткл даалгъврити әрүнәр кўцәхв гидж келв.